

盤洲文集

八

蘇軾詩集

PDG

盤洲文集卷第四十五

乞出第一劄子

十一月十六日

臣聞棟榑椽杙材之大小不齊者若梓人以棟爲椽以杙爲榑則覆壓之患當在朝夕聖主用材顧豈梓人之比然此言雖小可以喻大臣暮爾疲驚自幼以綴文爲業志在塵竊一第而已不自意留落之後誤叨眷知擢在華近若使之掌制代言自視猶可勉強今承人之乏遂超邇列而使之謀王體斷國論天下之人皆謂不勝其任黽勉數月曾無消埃之補直情

徑行浸積仇怨內之既不能識拔實材使之穆穆列
布以助成勵精之治外之又不能消弭姦究致令民
弗莫居而無鉏治之策揆之漢法當在石慶切責之
科儻或強顏患失則誤國之罪誅之無益伏望陛下
推天地之大恩憐斗筭之無用曲賜保全許臣上印
綬而去庶幾不妨賢者之路干冒威顏臣無任奉御
筆降
詔不允不得
再有陳請

第二劄子 十七日

臣昨早具劄子乞解機政跼踖踰夕未聞天旨不避
斧鉞再輸情悃伏念臣一介寒賤初無致君澤民之

學仕於州縣米鹽靡密畏簡臺臺理獄訟尚猶少有所
長今驟居高位掌樞獨久而政路贊襄上無台揆軍
國重事豈非材嘗試之地小智曲見乖繆浸彰加以
心力凋耗事至輒忘若視蔭空餐不能知難而退則
罪愆日積將不可赦伏望睿慈察其不逮賜之歸田
則未淪溝壑之前皆銜恩之日月游瀆宸嚴臣無任
戰灼俟命之至取進止

奉御筆再
降詔不允

第三劄子

十八日面進

臣此殫誠悃冒犯咫尺頗僣拜恩私再降溫詔銜感之
深淪胥心髓伏念臣疎遠冥頑孤立無接偶因清燕

浸簡宸衷擢之禁途馴至政地奏啓之際每蒙嘉獎
臣受陛下之知不爲不厚常謂粉身糜骨不足圖報
夫犬馬尚能戀主顧臣豈應輕爲去就以忘陛下隆
天厚地之恩但以臣材局褊淺智識蒙昧旣無嘉猷
遠畫可以振起治功而不量其力欲抑僥倖以奉陛
下正紀綱守法度之訓所慮積日累月寔招衆惡進
無所補虛負使令此臣所以日夜恐懼不安其位傾
瀝肝鬲冀回天聽伏望聖慈曲賜矜宥三瀆嚴威死
有餘罪臣無任戰灼悸汗之至

辭免除右僕射兼樞密使劄子

臣伏蒙聖恩除臣尚書右僕射同中書門下平章事兼樞密使特降中使宣押臣赴都堂治事臣聞命震驚罔知所措竊以人主居崇高之位一日萬幾獨以論相爲職盖用人賢否關國重輕繫民休戚非百執事之比必有負王佐之材隆巖石之望者斯能副眷注之意古之人居畎畝之中樂堯舜之道其尊主庇民之業皆素定於胸中故達而在上發其緼蓄可以使是君爲堯舜之君使是民爲堯舜之民功烈著於當世名譽垂於無窮若是則居其位食其祿仰無所愧俯無所忤如臣者翰墨腐儒斷無它技智效一官

猶懼不及乃使之代天理物其覆餗可日月異制命
既傳群聽已駭伏望

陛下曲回淵鑒洞察赤情圖任人英勿嫌反汗庶幾
微臣得逃非據之大譴不至重爲天下後世之所詆
訾干犯天威臣無任

乞薦舉監司郡守劄子

十二月十六日

臣聞內治之急在乎官得其人今州縣之間僅監司
郡守皆賢則職事修舉下無蠹弊屬吏之能否如鏡
燭形無所逃隱自數年以來非不開薦舉之路而風
俗未變挾私勝公干請奔競曲爲題目剡章所譽非

其親舊則是蒙恩託契之家或甲乙宛轉更相酬報
名爲公薦多是私心故薦牘雖交於公車有司亦視
爲文具置籍中書未嘗舉行臣以驚下偶補台輔之
闕見識不明聞聽不廣遠近人材臣不能知其一二
若賢者退而家食仕者不稱其職臣則有罪欲乞令
侍從臺諫兩省官舉風力堪爲監司吏能堪爲郡守
者各一人三衙知閤舉材武可守邊者一人舉而不
實甘坐其罪俟舉牘旣集臣與同列采其名實相稱
者一一除授或未有窠闕則簿錄以待有關日先除
各於除書內稱列所舉者姓名它時若有治行著聞

則乞推進賢之賞若所舉之人或進對不稱旨或爲臺諫論列或爲監司案劾或爲百姓訟訴驗治有狀隨其罪之大小具舉者姓名取旨必罰若宰執徇私隱而不奏者亦乞懲戒庶幾實材輩出振起治功天下幸甚取進止

以霖雨乞罷政第一劄子

乾道二年三月

臣伏見季春之月天多陰晦而盛寒如冬大雨仍降蠶麥秧苗俱有損壞仰軫聖慮致於玉食頻去葷味燮理如此罪將安歸而又僕僕祈求羞對輿阜儻或患失不去必致人言伏望睿慈特賜譴絀庶幾可以

調玉燭而格豐年干冒宸旒臣無任

御筆霖雨稍多未至有害於蠶

麥降詔不見不得更有陳請

第二劄子

臣以斗筭之資竊台輔之位夙夜危懼莫知逃責之計涉春以來常陰爲沴禱空宮以迎梵像放房縉而蠲門稅一月至再矣變調無狀靡所錯躬上之則使太官屏常珍而進蔬饌下之則使農夫紅女懷耕織之憂臣之罪多矣隆恩天覆不即策免臣上章自劾拱聽威命而宸札矜容必置嚴譴降詔之訓異於常典銜感隕越不欲自赦伏懇聖明施行漢法罷遣歸

田圖任異材俾熙帝載則和氣可召咎證可消矣干
觸天聽臣無任戰 待罪之至

再乞罷任劄子

臣材劣能下無足算錄誤叨眷知超居宰揆力小任
重自料必致顛隳比以淫雨爲害抗章請罪仰蒙聖
恩拊以溫詔今早再瀝誠懇又勤天獎使之安職公
議不貸遂玷霜簡仰負陛下使令之意雖九死無以
塞責伏望睿慈令臣解罷機政以聽譴罰之命干犯
咫尺威臣不勝震灼之至

辭免觀文殿學士第一劄子

臣伏聞已降制命特授臣觀文殿學士提舉江州太平興國宮任便居住臣驚傳恩旨感涕橫臆伏念臣不材無取誤蒙簡拔輔政旬月曾蔑補報孤負任使浸積過僭竄流遐遠乃法之宜豈期優恩曲垂軫卹使之奉祠還鄉已爲大幸書殿隆名所以寵老臣碩德之去豈凡庸罪戾之人可以叨此非常之渥若或冒處益重疾顛伏望聖慈特賜追寢庶使危蹤免抵大譴干犯宸嚴臣無任
之至

第二劄子

臣伏准閣門降制告一道

臣仰窺制

命感涕交流伏念臣竊位台衡秋毫無補小器盈滿
福過災生罪愆既彰難逃清議儻非聖明憐惻則尸
諸兩觀未足塞責臣自聞寵渥已瀝懇辭跼蹐至今
未蒙追寢夫書殿美名真祠優祿皆非臣所當得若
或貪居冒受則大譴大何益重顛覆伏望聖慈特賜
處分所有告命臣未敢祗受

辭免知紹興府第一劄子

今月二日伏准遞到尚書省劄子七月十八日奉聖
旨除臣知紹興府臣跽聞寵命不勝戰兢伏念臣材
力縣薄智術乖疎比自入朝獨叨眷遇超居宰揆燮

理無功百謫既盈罪當寬宥聖恩寬大委曲保全奉
祠還鄉纔踰兩月敢謂軫記不忘即加選用捫襟感
泣何以論報念稽山密拱行闕實惟雄藩豈伊罪戾
之餘可堪師帥之任伏望聖慈改授真材用協群議
免使孤蹤重罹顛沛干冒宸嚴臣無任隕越俟命之
至

第二劄子

臣近具奏劄辭免知紹興府恩命今月二十二日准
都進奏院遞到詔書一道伏蒙聖慈降詔不允者臣
伏讀聖訓感涕交流伏念臣疎庸之資嘗試無狀狼

猥去國方此省愆宸眷不遺屢垂簡記亟加枚括付以大藩仰惟天地之隆恩即當聞命而引道載念陪京之重夙稱謀帥之難而臣聞望素輕譴何未久深虞曠敗復累生成輒瀝愚衷游干洪造伏望眷慈憐其無用許令依舊奉祠庶休田里之居獲享治安之樂所有恩命臣未敢祗受干犯天威臣無任感戴戰懼俟命之至

除紹興第一手劄子八月四日

臣入朝二年居輔弼之官十閱月以駑鈍無用之資識不足以燭微才不可以任重獨蒙陛下眷知異等

寬其不逮之罪溫顏殊禮常賜稱獎臣殫智竭誠亦
欲盡死以報柰何福過災生招致人言上惑聰聰聖
恩寬大不忍竄逐使得以祕殿真祠優渥里閭臣方
懼叨縻廩稍無所云補豈意簡記之隆付以近鎮驚
懼感泣不可具言已瀝忱誠懇祈寢免臣犬馬戀軒
之情雖食息不敢忘隆天厚地之恩但以得罪去國
不敢以奏牘輒至冕旒之前今者旣蒙眷慈再加收
用故敢略披梗槩臣螻蟻賤微銜戢恩渥何以圖報
干犯宸嚴臣無任戰懼之至

第二劄子

月二十二日

臣近貢免牘 扣九閤伏蒙天慈賜之溫詔臣素叨
眷遇之異仰惟選用大恩便當即日上道特以會稽
近藩衆所注目而臣罪譴之餘去國未幾若或貪榮
疾趨必致重遭譏訾輒敢稽留詔命復布悃誠已別
具奏劄乞賜施行伏望聖慈察臣愚衷赦其再瀆之
罪臣干犯宸嚴不勝戰懼之至

第三手劄子

臣比辱誤恩俾守輔郡荐彈誠悃非獲俞旨不敢重
干威聽已祇拜告命取信州路自衢入婺迤邐到越
謹具奏稟伏乞睿照